

Na osnovu člana 30. stav (1) tačka m) i stav (2) i člana 43. Zakona o plaćama i naknadama u institucijama Bosne i Hercegovine ("Službeni glasnik BiH", broj 50/08), člana 50. stav (4) tačka d) Zakona o radu u institucijama Bosne i Hercegovine ("Službeni glasnik BiH", broj 26/04, 7/05 i 48/05) i člana 17. Zakona o Vijeću ministara Bosne i Hercegovine ("Službeni glasnik BiH", broj 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine na 81. sjednici, održanoj 26. marta 2009. godine, donijelo je

ODLUKU

O NAČINU I POSTUPKU OSTVARIVANJA PRAVA NA NAKNADU U SLUČAJU SMRTI ZAPOSLENOG U INSTITUCIJAMA BOSNE I HERCEGOVINE

Član 1.

(Predmet Odluke)

Ovom Odlukom uređuje se način i postupak ostvarivanja prava člana uže porodice zaposlenog u institucijama Bosne i Hercegovine na naknadu u slučaju smrti zaposlenog, u skladu sa članom 43. Zakona o plaćama i naknadama u institucijama Bosne i Hercegovine i članu 50. stav (4) tačka d) Zakona o radu u institucijama Bosne i Hercegovine.

Član 2.

(Pojam člana uže porodice)

Pod članom uže porodice zaposlenog u institucijama Bosne i Hercegovine u smislu ove Odluke smatraju se: bračni i izvanbračni drug, dijete (bračno, izvanbračno, usvojeno, pastorče i dijete bez roditelja uzeto na izdržavanje) i roditelji (otac, majka, očuh, maćeha, usvojitelj i hranitelj).

Član 3.

(Način dokazivanja smrti zaposlenog)

- (1) Smrt zaposlenog u institucijama Bosne i Hercegovine dokazuje se na osnovu dokumentacije izdate od strane mjerodavne institucije.
- (2) Institucija kojoj je zahtjev za naknadu podnesen dužna je službenim putem provjeriti tačnost priložene dokumentacije.

Član 4.

(Visina naknade)

U slučaju smrti zaposlenog u institucijama Bosne i Hercegovine, u skladu sa članom 43. stav (1) Zakona o plaćama i naknadama u institucijama Bosne i Hercegovine, članu uže porodice zaposlenog pripada pravo na jednokratnu novčanu pomoć u visini šest prosječnih mjesečnih neto plaća u Bosni i Hercegovini utvrđenih na način propisan članom 7. stav (1) Zakona o plaćama i naknadama u institucijama Bosne i Hercegovine.

Član 5.

(Uslov za ostvarivanje prava na naknadu)

Da bi član uže porodice zaposlenog ostvario pravo na naknadu u slučaju smrti zaposlenog u institucijama Bosne i Hercegovine, potrebno je priložiti kućnu listu kojom se dokazuje da je podnosioc zahtjeva za naknadu živio s zaposlenim u zajedničkom domaćinstvu odnosno izjavu podnosioca zahtjeva da on snosi troškove po osnovu smrti zaposlenog.

Član 6.

(Postupak ostvarivanja prava na naknadu)

- (1) Da bi član uže porodice zaposlenog ostvario pravo na naknadu u slučaju smrti zaposlenog u institucijama Bosne i Hercegovine, dužan je podnijeti zahtjev za naknadu.
- (2) Zahtjev za naknadu u slučaju smrti zaposlenog može podnijeti samo jedan od članova uže porodice zaposlenog u institucijama Bosne i Hercegovine i to po redoslijedu kako je utvrđeno u članu 2. ove Odluke.

Član 7.

(Izuzeci u primjeni)

Od odredbi ove Odluke izuzeti su policijski službenici u skladu sa članom 43. stav (3) Zakona o plaćama i naknadama u institucijama Bosne i Hercegovine. U slučaju smrti policijskih službenika primjenjuju se odgovarajuće odredbe člana 92. Zakona o policijskim službenicima Bosne i Hercegovine.

Član 8.

(Obračun i isplata naknade)

Obračun i isplata naknade u slučaju smrti zaposlenog u institucijama Bosne i Hercegovine vrši se hitno, a najkasnije u roku od 5 dana od dana podnošenja zahtjeva za naknadu i dokumentacije.

Član 9.

(Institucije odgovorne za provođenje Odluke)

Za realizaciju ove Odluke zadužuju se institucije Bosne i Hercegovine i Ministarstvo finansija i trezora.

Član 10.

(Stupanje na snagu i primjena)

Odluka stupa na snagu narednog dana od dana objavljivanja u "Službenom glasniku BiH", a primjenjivat će se od 01. 01. 2009. godine.

VM broj 80/09
26. marta 2009. godine
Sarajevo

Predsjedavajući
Vijeća ministara BiH
Dr. Nikola Špirić, s. r.
